

1918 թվի յունւարի կէսերին, Շամքորի արիւնոտ դէպքերից յետոյ, ընդհատւեց երկաթուղային կապը, և Բազուն կտրւեց Թիֆլիսից ու Ղարաբաղից: Բազու-Գանձակ ճանապարհը մնաց թուրքերի ձեռքը: Պատահաբար անցնող զնացքներով հայերը չէին կարող ճամբորդել. նրանց հանում էին վազոնից ու տեղն ու տեղը սպանում: Այդ պատճառով, Բազում կուտակւում էին աւստրեզերմանական ճակատից տուն վերադարձող հազարաւոր հայ զինւորներ, որոնք անգործ թափառում էին փողոցներում, շատ թշուառ վիճակի մէջ: Նրանց ջղայնացնում էին Ղարաբաղից, Գանձակից և հայաբնակ ուրիշ վայրերից հասնող լուրերը հայ-թրքական ընդհարումների մասին: Բազում նրանք պայթուցիկ նիւթ էին, որ հեշտութեամբ կարող էին գործիք դառնալ բռնիքի և ուրիշ անիշխանական տարրերի ձեռքին: Ուստի, Ազգ. Խորհուրդը իր վրա առաւ նրանց հոգատարութիւնն ու կազմակերպումը՝ նպատակ ունենալով պատրաստել կանոնաւոր զինւորական մասեր և ուղարկել ռազմաճակատ:

Հայկական զօրամասերի կազմակերպման գործը յանձնւեց Համադասապին: Որոշւեց կազմել 1200 հոգինոց մի գումարտակ: Այս քայլը առաջ բերեց արտակարգ ոգեւորութիւն: Արձանագրւել ցանկացողների թիւը այնքան մեծ էր, որ չուտով ստեղծւեց 3 գումարտակից բաղկացած 3000 հոգինոց մի զօրամաս, այսպէս կոչւած, Համադասապի բրիգադը: Բացի այդ, Ազգ. Խորհուրդը կազմակերպեց 2րդ հայկական պահեստի գունդը գնդ. Ս. Եղիազարեանի հրամանատարութեան տակ: Այդ գնդի կարիքների համար, մեծ դժարութեամբ, ստացւեց, ռուսական նախկին 279րդ գնդի զոյքերի մնացորդը: Զօրամասերի հազուստը, սարքաւորումը, ուտելիքը և այլն հայթայթում էր Ազգ. Խորհուրդը:

Միաժամանակ, Բազուի Ազգ. Խորհուրդը իր վրա առաւ հայկական ներկայացուցչութեան դերը դաշնակիցների, Ռուսաստանի ու Պարսկաստանի նկատմամբ: Ապր. 20-ին նա Մոսկւա ուղարկեց Արտ. Զինվարեանին և Սիմ. Յակոբեանին՝ յանձնարարելով, որ առաջինը, Լիպ. Նազարեանի հետ միասին, յարաբերութեան մէջ մտնէ Բերլինի հետ, իսկ երկրորդը աշխատէ Ռուսաստանում: Նպատակն էր՝ ապահովել խորհրդային իշխանութեան աջակցութիւնը՝ կազմակերպելու համար հայկական զօրամասեր, օժտելու նրանց նիւթական միջոցներով ու ռազմամթերքով, ճանաչել Ազգ. Խորհրդի իրաւասութիւնը, ի հարկին, թոյլ տալ անգլիացիների մուտքը Բազու և, առհասարակ, օժանդակել Կովկասի ինքնապաշտպանութեան գործին:

Խորհրդ. իշխանութիւնն ընդառաջ գնաց այս դիմումին. Ստալինը մի հրամանով արտօնեց հայերի զօրաչարժ կատարել և տուրք դնել հայ հարուստների վրա. խոստացւեց ռազմամթերք և անպաշտօն կերպով համաձայնութիւն տրւեց, որ անգլիացիները մտնեն Բազու: Սակայն, քիչ յետոյ, այս բարեացակամ վերաբերումը փոխւեց, և յունիսին արդէն, նոյն Ստալինը, Լենինի անունից, հեռագրում էր Շահումեանին, որ Խորհրդ. Ռուսաստանի սահմանները պէտք է հասնեն մինչև Գանձակ և Բազուն: